


# TEZAU LITURGIC

**3 IULIE**

# ACATISTUL SF. CUVIOS NICODIM DE LA KOJEEZERSK



**MOSCOVA, 2000**



**Акафист**  
**святому преподобному**  
**Никодиму, Кожеезерскому**  
**чудотворцу**

**Кондак 1**

---

Избранный от Воеводы сил небесных, приим крест свой, последовал еси Христу, преподобне отче наш Никодиме. Темже, яко дерзновение имеяй ко Господу, молися выну, от всяких бед и скорбей избавитися нам и душ спасение получитьи, да благодарственно зовем ти: Радуйся, Никодиме, скорый наш помощниче, Кожеезерский чудотворче.

**Икос 1**

---

Ангела на земли яви тя милосердый Творец небесе и земли: вся бо земная в уметы вменил еси, преподобне Никодиме, да Христа приобрящеши. Темже вси, многотрудное житие и блаженную кончину твою зряще, радостно тебе вопием:

Радуйся, от детства твоего в жилище Духа Святаго чистое и непорочное предуготованный;

Радуйся, ко иночеству гласом свыше призванный.

Радуйся, от лютаго недуга чудесне изцеленный;

Радуйся, еще в мире яко пустынный Хозьюгский прославленный.

Радуйся, от Пафнутия ко стаду Христову причтенный и Божественным писанием наученный во спасение;

Радуйся, от царствующаго града во страну полунощную устремивыйся.

Радуйся, во обители Кожеезерстей безплотных житие показавый;

Радуйся, в пустыни Хозьюгстей водворився, со врагом спасения брань совершивый.

Радуйся, вся приращения того отгнавый, на высоту же добродетелей востекий;

Радуйся, благодати сосуде избранный.

Радуйся, с небесными лики нетленнаго Царя ублажаяй, на земли же выну прославляемый;

Радуйся, Никодиме, скорый наш помощниче,  
Кожеезерский чудотворче.

### **Кондак 2**

---

Видя тя Владыка угодна Себе быти,  
преподобне отче Никодиме, егда млад сый, пасл  
еси в поли стадо отца твоего, призва тя, суща  
именем Никиту, гласом: «Никодиме, Никодиме!»  
Ты же, сего убоаяся, возвратился еси ко  
родителем, поведав им бывшая. Они же,  
видевше Владычнее к тебе милосердие,  
благодарственне воспеша Богу: Аллилуиа.

### **Икос 2**

---

Разум добрый от юности стяжавая, к  
небесным чистое сердце твое устремил еси,  
преподобне Никодиме. Сего ради вопием ти:

Радуйся, сыне молитвы, рождших тя  
земледельцев похвало;

Радуйся, от младых лет к Церкви Божией  
прилепивыйся.

Радуйся, труды своя молитвою выну  
услаждавый;

Радуйся, на селе трудящу ти ся, к деланию  
духовному предуказанный.

Радуйся, родители своя до скончания их  
честне упокоевавый;

Радуйся, послушания сыновняго наставниче.

Радуйся, от Иваньковы веси во грады  
Ярославль и Москву кроткий пресельниче;

Радуйся, кованием гвоздий приобретаемый  
потребная.

Радуйся, от техже питаемый и гладныя;

Радуйся, целомудрия и чистоты душевныя  
рачителю.

Радуйся, тайн Божиих верный хранителю;

Радуйся, Никодиме, скорый наш помощниче,  
Кожеезерский чудотворче.

### **Кондак 3**

---

Силою свыше от лютыя смерти избавлен был  
еси, преподобне Никодиме. Сущу бо недугующу,  
предста ти святой Василий, Христа ради  
юродивый, и от чаши своея повеле испити; ты  
же, с верою сие сотворив, абие здрав был еси и  
благодарственне воспел еси Богу, дивному во  
святых Своих: Аллилуиа.

---

## Икос 3

Имеяй богатство милосердия неизреченное, скоро руку помощи Своея простре ти Господь, преподобне Никодиме: зане с верою к Тому притекл еси, на Него единого все упование свое возложив. Темже мы, видяще веру твою и оправдание ея дивное, умиленно вопием ти:

Радуйся, благочестиваго дружества наставниче;

Радуйся, благонравия ради, злою женою единогохудожнаго ти мужа возненавиденный.

Радуйся, от тоя вкусивый яства со ядом, имже муж ея умре абие;

Радуйся, Божиим смотрением от верныя смерти избавленный.

Радуйся, яко, недугом чревным одержим быв, христианскаго терпения наставник показался еси;

Радуйся, явльшагося ти блаженнаго Василия собеседниче.

Радуйся, яко от чаши сего вкусив, от недуга изцелился еси;

Радуйся, по изцелении единому Богу поработати возжелавый.

Радуйся, молитвою указания пути себе просивый;

Радуйся, сие приемый во гласе Илии, пустынное житие ти предрекшаго.

Радуйся, в мире пожив, ничимже Бога прогневавый;

Радуйся, Никодиме, скорый наш помощниче, Кожеезерский чудотворче.

#### **Кондак 4**

---

Бури многих бед и напастей в мире сем бегая, пришел еси, преподобне Никодиме, ко блаженному Илии, вразумления ища, и тому последовав, вселился еси во обитель иноческую архистратига Михаила, отнюдуже, подвигом пустыннаго жития, преселился еси во обители небесныя, идеже с лики Ангельскими поеси Богу: Аллилуиа.

#### **Икос 4**

---

Слышав Пафнутий о гласе, к тебе бывшем, абие проразуме тя благодати сосуд избран, явится хотящъ, и во иноческий образ облече тя,

преподобне. Мы же, проразумение того  
сбывшееся зряще, вопием ти:

Радуйся, во обитель архистратига Михаила  
вшедый на спасение;

Радуйся, от архимандрита Пафнутия любезне  
приятый.

Радуйся, четыредесятидневный пост по  
образу Христову совершивый;

Радуйся, вся испытания люботрудне  
исполнивый.

Радуйся, образом равноангельным достойне  
почтенный;

Радуйся, труды ко трудом, посты ко постом  
прилагавый.

Радуйся, кротостию сугубую любовь  
озлоблявших тя стяжавый;

Радуйся, со свещею во храме достойне  
Богви предстоявый.

Радуйся, по всем житии zde преподобному  
Адриану, собрату Пафнутиеву, поревновавый;

Радуйся, добрый подвижниче благочестия.

Радуйся, новоначальным иноком правило;

Радуйся, Никодиме, скорый наш помощниче,  
Кожеезерский чудотворче.

### **Кондак 5**

---

Боготочную кровь Христа, за ны пролиянную,  
духовныма очима выну созерцая, преподобне  
отче Никодиме, прилепился еси совершенною к  
Тому любовью. Темже Пафнутия, в митрополита  
на Крутицы преведенна, оставил еси, преселив  
же ся в пустыню Хозьюгскую, со едином  
Христом в делании духовнем пребывал еси, поя  
Тому выну: Аллилуиа.

### **Икос 5**

---

Врагу, присно на пустынные ополчающуся,  
жестоким житием противустал еси, преподобне  
Никодиме, плоть духови твоему поработив  
воздержанием. Темже мы, подвигом твоим  
чудящися, зовем ти:

Радуйся, в Кожеезерскую обитель от Крутиц  
удалившийся, славы и молвы уклоняся;

Радуйся, Ангелу своему житием zde  
уподобивыйся.

Радуйся, от Серапиона и Авраамия  
благословение приим, келлию в пустыни  
соградивый;

Радуйся, яко хлад тоя не превозможе  
пламенныя веры твоея.

Радуйся, ту ветхаго человека в себе  
умертвивый;

Радуйся, дни и ноци в слезней молитве  
стоявый.

Радуйся, от млека и иных яств отрекийся,  
плоды же сельными питавайся;

Радуйся, от рыб вкушавый, точию егда  
квасны суща червьми исполняхуся.

Радуйся, воздержания образе;

Радуйся, сластолюбцев посрамление.

Радуйся, со врагом спасения брань велию  
ведый;

Радуйся, Никодиме, скорый наш помощниче,  
Кожеезерский чудотворче.

### **Кондак 6**

---

Проповедают подвиги твоя, преподобне  
Никодиме, вси концы земли, люботрудному  
житию твоему чудящися. Воздвиже бо на тя  
брань лютую враг спасения, прираженьми плоти  
и уныния тебе искушая; ты же постом и

молитвою таковая соодолел еси, благодарственне  
воспев Богу: Аллилуиа.

## Икос 6

---

Возсия благодать в подвизех пустынного  
жития твоего, преподобне Никодиме. Не точию  
бо на тя бывшая искушения мужественне  
отразил еси, но и всем во искушениях мудрый  
споборник явился еси, да с радостию тебе  
вопием:

Радуйся, святого ради жития от Бога зело  
возлюбленный;

Радуйся, яко сего ради дуси злобы в конец на  
тя озлобишася.

Радуйся, искушение плотское твердо  
отразивый;

Радуйся, яко молитву сотворив, силою креста  
в зраке жены древо ветхо объявил еси.

Радуйся, исхитившим потребная Именем  
Иисуса возвратити тая повелевый;

Радуйся, сущей келлии потопляеме, от  
молитвы в ней не преставый.

Радуйся, зря оную во огненном запалении,  
никакоже устрашивыйся;

Радуйся, безстрастия проявителю.

Радуйся, твердый в бедах на Бога упователю;

Радуйся, тщавшийся тя погубити безсиленны сотворивый.

Радуйся, в покров себе имевый Пресвятую Богородицу, пред Еяже образом выну умиленно прекланялся еси;

Радуйся, Никодиме, скорый наш помощниче, Кожеезерский чудотворче.

### **Кондак 7**

---

Хотяй Владыка явити тя, преподобне отче Никодиме, мужа во всем совершенна, попусти врагу последи искусити тя по всяческим гордыни своея приражением: представаху бо ти множества льстивых духов, глаголавших свята и велика тя быти, да возгордевся падеши. Ты же смирением искушения посрамив, победне воспел еси Богу: Аллилуиа.

### **Икос 7**

---

Новая купель Силоамская явися ти, преподобне, пустыня Хозьюгская, в нейже от всякия болезни душевныя изцелился еси, и яко

муж в меру возраста Христова, Богови предстал еси. Тем вопием ти:

Радуйся, вся приражения духов злобы яко дым разсеявый;

Радуйся, понеже Сам Христос спобораше по тебе.

Радуйся, истинного трезвения учителю;

Радуйся, спасительнаго созерцания любителю.

Радуйся, бодрственнаго к себе внимания стяжателю;

Радуйся, Антония, Онуфриа и Павла Фивейскаго единоправниче.

Радуйся, яко со оными днесь на небесех ликуеши;

Радуйся, яко с теми Христу ныне молишися, да низложится сила диаволя.

Радуйся, от Бога над многими, яко верен раб, поставленный;

Радуйся, еще в житии на земли, яко чудотворец дивен явленный.

Радуйся, страны нашея славо и украшение;

Радуйся, Никодиме, скорый наш помощниче,  
Кожеезерский чудотворче.

### **Кондак 8**

---

Странники суца на земли сей, преподобне  
Никодиме, враг присно искушает ны и многи  
поставляет препоны, да не достигнем отечествия  
небеснаго; но ты, яко сокрушивый того  
ухищрения, помози нам, житие твое  
поминающим. Дадесе бо ти благодать помыслы  
разумети, недуги целити и выну быти со  
призывающими тя верою и купно Богу  
поющими: Аллилуиа.

### **Икос 8**

---

Все житие наше на земли печали и скорби  
полно есть, искушения же и падения предлежит  
нам претерпети; но ты помози нам, преподобне,  
да благодарственно зовем ти:

Радуйся, помышления сердец провидевый;

Радуйся, злонравнаго Феодосия на путь  
спасения призывавый.

Радуйся, гордыню того обличивый;

Радуйся, Иоанну ученику твоему и инем от  
зубнаго недуга даровавый изцеление.

Радуйся, тогожде очесем возвративый зрение;

Радуйся, в мори потопляемым ловцем скорое избавление приведый.

Радуйся, яко никтоже, вразумления иский, тощ от тебе отыде;

Радуйся, сердце скорбных уврачевателю.

Радуйся, яко коегождо от мудрости жития твоего наставлял еси;

Радуйся, нищ сый плотию богатство многоценное дарований духовных имевый.

Радуйся, аки крин в Хозьюгстей пустыни явивыйся;

Радуйся, Никодиме, скорый наш помощниче, Кожеезерский чудотворче.

### **Кондак 9**

Всею душею прилепився Богови, славою земною не уязвился еси, преподобне Никодиме, дар бо патриарха, аще и с честью приял еси, абие обители предал еси, глаголя: «Довлеет моей худости одинаго рубища». Темже и нас добродетели сей научи, во еже чистыми усты пети Богу: Аллилуиа.

## Икос 9

Витии премудрии высоту твоих подвигов  
всюду возвестиша, преподобне, темже и  
первосвятитель Церкви даром своим смирение  
твое чествовати хотяше. Мы же, добродетели  
твоя воспевающе, в похвалу тебе сия вопием:

Радуйся, из пустыни, яко солнце светлое, вся  
осиявый;

Радуйся, от патриарха ублаженный.

Радуйся, тем не возгордевыйся;

Радуйся, моления и воздержание усугубивый.

Радуйся, четыредесять дней и ночей в  
пещере моливыйся, ничимже питаея;

Радуйся, славословием непрестанным  
Ангелом уподобивыйся.

Радуйся, лютость зверей дивних благостию  
своею укротивый;

Радуйся, яко елени множицею приходяду,  
молящу ти ся, и хождаху окрест тебе, никакоже  
боящися.

Радуйся, тридесять лет в пустыни  
непреткновенно поживый;

Радуйся, оскудевшу ти последи силами,  
ликом небесным восхотевый приложитися.

Радуйся, к сему душу подвигом добрым  
предочистивый;

Радуйся, Никодиме, скорый наш помощниче,  
Кожеезерский чудотворче.

### **Кондак 10**

---

Спаستися хотя и со Христом быти, о сем  
Господа молил еси, преподобне Никодиме.  
Человеколюбец, же Бог, приим моление сие,  
посла ти в видениях святителя Алексия и  
Дионисия архимандрита, скорое твое отшествие  
и ко избранным причтение поведати, с нимиже  
ныне поеши Ему: Аллилуиа.

### **Икос 10**

---

Стена ти бысть, преподобне Никодиме, икона  
Пресвятая Владычицы, еюже прежде в  
путьшествие благослови тя Пафнутий: тою бо  
осеняем, течение жития скончав на земли,  
слышати небесную весть сподобился еси. Темже  
ныне радостно вопием ти:

Радуйся, Пречистою Владычицею  
соблюденный;

Радуйся, в молитве скоро от Бога  
услышанный.

Радуйся, святителем Алексием и  
преподобным Дионисием посещенный;

Радуйся, яко тии ревнителя тя преподобным  
любезне нарицаху.

Радуйся, скорое сопричтение ко Ангелом  
уведевый;

Радуйся, по умолению Ионы паки в  
Кожеезерскую обитель пришедый на скончание.

Радуйся, до конца повиновавыйся  
начальником;

Радуйся, радостно братиею во обители  
целованный.

Радуйся, ко блаженному пристанищу  
приблизивыйся;

Радуйся, яко приспе час скончания твоего  
тих и радостен.

Радуйся, Никодиме, скорый наш помощниче,  
Кожеезерский чудотворче.

### **Кондак 11**

---

Пение всеумиленное принесоша Богу  
Кожеезерская братия, преподобне Никодиме,

блаженную кончину твою зряще. Обретоша бо тогда лице твое, яко лице Ангела, и благоухание дивное всю обитель исполни, от святаго тела твоего исходящее и всех научающее пети: Аллилуиа.

## Икос 11

---

Яко светоприемная свеща, углем благодати Божия возжженная, озарил еси, преподобне Никодиме, чудесы твоими обитель Кожеезерскую, в нейже и цельбоносныя твоя мощи славно почивают. Темже радостно вопием ти:

Радуйся, добрый воине, от Христа венцем славы увязенный;

Радуйся, яко по пришествии во обитель, благословение твое аки дар Божественный приемля, кийждо упокоити тя хотяше.

Радуйся, в келлии пусте уединения ради водворивыйся;

Радуйся, в недужех сам себе послуживый.

Радуйся, частым приятием Святых Тайн со Христом сочетаваыйся;

Радуйся, немощен сый от молитвы никакоже преставый.

Радуйся, во псалмопении к Богу отшедый;  
Радуйся, благоухания дивнаго источниче.

Радуйся, святяя бо мощи Твоя, яко знамя  
победное, иноком явишася;

Радуйся, и по отшествии твоём нас не  
оставляй.

Радуйся, подвизающимся о спасении  
невидимый споспешниче;

Радуйся, Никодиме, скорый наш помощниче,  
Кожеезерский чудотворче.

### **Кондак 12**

---

Благодати великия носителя и будущаго всех  
воскресения уверителя людем Господь дарова  
тя, преподобне Никодиме. Вси бо, с верою к  
нетленным мощем твоим притекаюции, молитв  
исполнение и надежду общаго воскресения  
улучают, благодарственне поюще Богу:  
Аллилуиа.

### **Икос 12**

---

Поем твоя милости и чудеса, преподобне  
Никодиме: выну бо и по отшествии твоём с  
нами пребываеши, Христу за ны моляся. Темже

от благодарных устен в похвалу тебе приносим  
сицевая:

Радуйся, молитвенниче наш усердный;

Радуйся, помощниче наш скорый.

Радуйся, от ломоты, черныя немощи и  
огневицы избавляяй;

Радуйся, яко жезл твой, аки Павлов убрус,  
источник изцелений явися.

Радуйся, яко милоть твоя, аки Илиина,  
чудотворения источаше;

Радуйся, на суши и мори от всех  
оставленным помощь подаваяй.

Радуйся, недугующих от смертнаго одра к  
жизни возвращаяй;

Радуйся, от наваждений духов злобы спасааяй.

Радуйся, всех недугов душевных и телесных  
врачу;

Радуйся, о спасении всех христиан теплый  
молитвенниче.

Радуйся, Никодиме, скорый наш помощниче,  
Кожеезерский чудотворче.

## Кондак 13

---

О преподобне и Богоносне отче наш Никодиме! Приими сие малое со умилением ти приносимое хваление, и со Пресвятою Владычицею и всеми святыми молися Господу Иисусу Христу, да избавит нас от всяких бед и скорбей, от враг видимых и невидимых, от напрасныя смерти и будущих мук, и сподобит нас со избранными Своими воспевати Ему во веки: Аллилуиа.

*(Этот кондак читается трижды, а затем икос 1 и кондак 1)*

### Молитва первая

---

О преподобне и Богоносне отче наш Никодиме! Велие имея к Богу дерзновение, молися выну о всех нас, зане буря многих бед и скорбей обдержит ны: недужи телеснии, болезни душевнии, приражения вражия обуревают ны. Ходит бо враг наш, иский кого поглотити, и ежечасно от того уловляемся; о спасении же своем нерадяще, несмы достойни воззрети на высоту небесную. Но ты буди нам помощник скорый и избавитель: яко сам искушен быв от врага, победив же сего доблественне, вразуми ны, да разумеем того ковы и приражения.

Подаждь убо нам память смертную, слезы покаяния и надежду спасения: да не во отчаяние впадем, ниже дерзостным на милосердие Божие упованием, во гресех же пребыванием в конец себе погубим, но да будет нам память грехов наших во источник теплых слез и сокрушения сердечного, милосердие же Божие и благодать Его, молитвами твоими, во спасение наше, ныне и присно и во веки веков. Аминь.

### **Молитва вторая**

---

О преподобне и Богоносне отче наш Никодиме! Предстоя Престолу Пресвятыя Троицы, молися выну о епископе нашем (имярек), о всем священном и иночестем чине, игумене же и братии обители твоея, о военачальницех и градоначальницех, и всех православных христианех: да ходим кийждо достойно звания нашего, в немже звани быхом, и да будет земля наша земля добрая, и вси живуции на ней, род избран, царское священство, язык свят, людие обновления, ныне и присно и во веки веков. Аминь.